



EDITORIAL

Pasuntukon ha hangin an kaaway ngan todo nga umopensiba

Naglalarang hi Duterte para ha iya ul-timo nga atake kontra ha rebolusyunaryo nga kagiusan. Nahisasalin nga masobra usa katuig han iya termino, nagtikadamo, nagtikaagsub, ngan nagtikamadarahug an iya mga operasyon militar, an pagpatay ngan pagdakop han mga aktibista, kritiko ngan inosente, ngan an pagsabrag han ngirhat ha bug-os nga nasud.

Kundi diri pa hiya nasasadangan hini. Nagsaad hiya nga diri gud magdedeklara han ukoy-bubto kontra ha BHB. Natikadako an mga pormasyon han AFP-PNP. Nagtambak hiya han mas damo nga tropa ha mga pokus nga erya sugad han Eastern Visayas. Susrunod nga naabot an mga ginpalit niya nga helikopter, idro, drone, bomba, ngan iba pa nga armas. Gin-oorganisa niya an mga kriminal nga grupo ngan *death squad* para ha kontra-insurhensiya. Natikaagsub an mga panmatay, pangaresto, ngan panarhug. Padayon nga ginhihikaw an hustisya para ha mga biktima han pasismo han estado.

Kundi an unob nga kamadarahug amo an hinungdan han kapakyasan han kontra-rebolusyunaryo nga gerra ni Duterte. Tungod hini nga todo-gerra, labaw hiya nga nahihimulag ngan ginkakangal-

san han katawhan. Naranubos na an ira pag-ato kontra ha iya terorista nga paghahadi. Nahiluag an languyan han mga rebolusyunaryo nga pwera agud pasuntukon ha hangin an kaaway ngan maipasulong an gerra han katawhan.

An ngatanan – pultaymer o kaapi han organisasyon masa, pwera ha mga sentro nga urban o ha kabaryuhan – kinahanglan pangandaman an maabot nga pinakamadarahug nga takna han pasista nga panlasurbo ni Duterte. Pangkatinan an sikreto nga paggios ngan himuon nga buta ngan bungol an kaaway agud malikyan an kahibangan ngan magin pinakaektibo an aton mga bira. Ilansar an ngatanan nga porma han pakig-away agud ipasulong an interes han katawhan. Pahiluagon an pagpukaw, pag-organisa ngan pagpagios kontra ha pasismo ngan pagpapakuri han rehimen Duterte.

Sakob hin pira kaadlaw, igseselebrar han rebolusyunaryo nga kagiusan ngan han masa nga Pilipino an ika-52 nga anibersaryo han Partido. Hitaas an ira determinasyon nga ungbawan an mga nagin kaluyahan ngan ngan kab-uton an mas dagko nga rebolusyunaryo nga kadaugan ha tidaraan. ■

Magburugto, ginpangistraping han 78th IB

PATURAPAK NGA GINPUSIL han mga elemento han 78th IB an magburugto nga Cadello nga hira Benan, 50, Boboy, masobra 40 anyos, ngan Ryan, 22, ha ira balay ha uma ha Brgy. Quezon, General MacArthur, Eastern Samar hadton Nobyembre 12.

Dapit alas-5 hin kaagahon hiton nga adlaw, bumati an taghimaryo han susrunod nga buto hirani ha ira baryo. Pagkaaga, gintirok hira han mga sundalo ngan ginpakadto an mga paryente han magburugto tungod kay samaran kuno hira. Nahiabtan na la han ira kauropdan ngan han usa nga upisyal han barangay nga tadtad hin bala an balay sugad liwat an mga higamit dinhi. Nagsarang liwat ha balay an damo nga dugo kundi tubtub yana waray pa kikitaa bisan usa ha magburugto.

Sigon ha Bagong Hukbong Bayan-Sergio Lobina Command (BHB-SLC), hadton Mayo pa ginpapakadto ha kampo han militar ngan lokal nga kapulisan an mga Cadello agud "magpalimpyo han rekord" kundi dumiri hira. Sering nira, pipiriton la hira nga magtrabaho kontra ha BHB ngan kun karawton nira ini kundi diri nira mapatuman, papatayon pa gi- hapon hira.

Western Samar. Duha nga parag-uma an pinakaurhi nga ginsumat nga biktima han ekstrahudisyal nga panmatay

Ayuda ha mga biktima han kalamidad, modus ha "pagpasurender"

Ginkakangalsan han mga taga-Western Samar mapan-nguwat nga pagkuha han ayuda tikang ha gubyerno kabalyo an "pagpasurender" nga ginpapatuman han mga elemento han 63rd IB, 801st IBde ngan mga lokal nga PNP.

Sigon ha sumat nga nakarawat han Bagong Hukbong Bayan-Western Samar (Arnulfo Ortiz Command o BHB-AOC), ginpagawas han mga sundalo ngan pulis nga mga kaapi han BHB nga "boluntaryo nga sumurender" an mga parag-uma nga makuha la kunta han ayuda nga kwarta ngan pagkaon hadton Nobyembre 20.

Reklamo han mga residente, ginsidngan hira han AFP-PNP nga makarawat hira han pinansyal nga bulig para ha mga ginlasurbo han mga naglabay nga kalamidad kun makadto hira ha bungto. Ha adlaw han distribusyon han ayuda, mga pulis mismo an naglibot ha mga baryo agud seguruhon an mga madulhog. Nagtalaan pa ini hin kota nga 150 katawo kada baryo.

Kahuman igpanhatag an *relief*, nahipausa an mga residente kun kay ano nagpapahayag an mga kumander han 63rd IB ngan 801st IBde sugad liwat an lokal nga hepe han PNP nga diri hira angay magpauwat ha BHB. Ginkuhaan liwat hira han mga rit-rato samtang mayda kapot nga karig-unan han ira nakarawat. Pag-uli nira, nadiskubre nira nga ginbandra na ha telebisyon ngan ha *social media* an ira mga nawong komo mga surrenderi.

Sigon ha BHB-AOC, bisan ano na la an ginhihimo nga pan-

uwat han 63rd IB ngan iba nga armado nga ahente ni Duterte ha mga parag-uma ha grabe nga desperasyon nga puy-puyon an BHB. Pahimatngon hini, dako nga posibilidad nga ginbursa na han higtaas nga upisyal militar an dako nga parte han pondo para ha buwa nga programa han pagpasurender.

Kinarawat la an mga residente hin P3,000, ngan *relief pack* nga mayda duha kalata han sardinas, duha kakilo han bugas, *alcohol*, *face mask*, kape, asukar ngan *shampoo*. Hirayo kaupay ini ha saad nga diri mamenos ha P15,000 kada surenderi ilarum han E-CLIP. Nakagasto pa hira han P300-500 para ha pagkaon, pamasaha, ngan mga dokumento sugad han *valid ID* ngan *barangay clearance* nga kinahanglan kuno para makuha an ayuda.

Ginkundenar liwat han mga residente an gubyerno tungod kay nanhahatag la ini han ayuda agud ipagawas nga mayda mga "sumurender" nga kaapi han BHB. ■



"Magburugto...", tikang ha paypay 1

han *death squad* han 46th IB. Kaparte hira han walo nga parag-uma nga ginpatay han berdugo nga batalyon yana nga tuig.

Ginpatay han mga tropa han 46th IB hi Juanita Pacayra, kapitana han

Brgy. Antol, Calbiga hadin Septyembre. Pareho nga pamaagi han pagkatok han balay an ginhimo han mga sundalo. Hi Pacayra an ikatulo nga kapitan han barangay nga ginpatay han 46th IB tikang han ibalik ini

ha prubinsya hadton 2019.

Ginpatay liwat han pareho nga batalyon hi Teddy Solayao, residente han Brgy. Magdawat, Pinabacdao samtang aada ha iya umhanan hadton Agosto. ■

Dunot nga kultura ha sakob han AFP

GINPATAY HAN USA nga elemento han CAFGU an kumander hini ha 46th IB kahuman waray na umilob han pangabuso ha Brgy. Bugho, Pinabacdao, Western Samar hadton Septyembre.

Ha sumat han Bagong Hukbong Bayan-Arnulfo Ortiz Command (BHB-AOC), gin-istraping han batan-on nga CAFGU an mga handler komo pagbulos ha pangingsog ngan pagbarubanyak ha iya han iya kumander. Tungod ini kay dumiri hiya nga mag-una ha ira kalakat ha kahadlok nga mabuthan han bomba.

Dayon hiya nga umiskapo ngan tulo kaadlaw nga nagtago ha mga sundalo nga nagsulay-sukay ha kagugub-an. Nadiskubre na la hiya han mga Pula nga mangaraway nga ura-ura nga maluya ngan waray iba nga dara labot han iya ginpuga nga riple nga R-4 ngan usa nga halipot nga pusil. Ginbuligan naman hiya han BHB-AOC ngan yana hirayo na ha kadelikaduhan.

Kahuman an insidente, nadiskubre han mga residente ha lugar an nagsasang nga higamit nga panlimpyo han samad. Waray na nira makita utro an kumander nga ginpusil. Duha kasemana liwat naman nga nagkagikan an mga sundalo nga naghihimo han operasyon nga RCSP ha mga baryo han Pelaon, Magdawat ngan Manaing han nasering nga bungto. ■